

«Mes num es David Spinnler
- restai pachific!»

pagina 3

Tge fa il svilup, la nova parti-
ziun da RTR?

pagina 7

As annunziat er il Swiss Quiz
2018

pagina 18

Rapports No Billag - profes-
siunals e neutrals

pagina 26

Editorial

Controllar, observar e far public

Il cas da las cunvegns da pretschs en la bransch da construcziun procura dapi emnas per lingias grossas. Tar talas istorgias datti per ordinari percents – els perdan uffizis, carrieras, la credibladad. Per ordinari – betg adina – tutgi las dretgas persunas: persunas publicas che n'ageschan betg en favur da la societad, persunas che cuntrafan a reglas aifer structuras da confidenza – per exempel en l'administraziun chantunala, en uffizis ed instituziuns che survegnan raps publics. Medias han l'incumbensa da controllar autoritads, d'observar cumulaziuns da pussanza, da far public malgiustias. Schurnalistas e schurnalists ston dentant esser conscients ch'els portan ina responsabladad. Betg la «story» che cuntenta il voyeurissem duess esser la motivaziun, mabain la voluntad da servir ad in interess public, d'esser fair ed agir correctamain envers tut ils protagonistas. Quels duain vegnir a pled e pudair dir quai ch'els han da dir, senza pre-sentenzias – enfin che la culpa n'è betg cumprovada. Per Vus, las persunas en quest pajais, en nossas regiuns, s'engascha RTR cun persvasiun per quests principis – ils principis dal schurnalissem da qualitat.

Ladina Heimgartner

Nov president per la SRG.R – Vincent Augustin succeda ad Oscar Knapp

L'advocat Vincent Augustin è il nov president da la societad purtadra da RTR, la SRG SSR Svizra Rumantscha (SRG.R). El daventa successur d'Oscar Knapp che terminescha sia perioda d'uffizi causa limitaziun da vegliadetgna la fin 2018.

(srg.r) Sonda, ils 26 da matg 2018, ha gi lieu en il Plantahof a Landquart la radunanza generala da la SRG SSR Svizra Rumantscha. En il center da la radunanza è stada l'elecziun dad in nov president per la SRG.R. La directura da RTR, Ladina Heimgartner, ha infurmà en quest rom sur da las fatschentas ed actualitads da RTR. A la fin è vegni surdà uffizialmain il premi SRG.R 2018 al «Chor d'affons Sumvitg» en renconuschientscha da l'engaschi per la cultura da chant. Persvadi ha la suprastanza da la SRG.R en spezial il grond engaschament da passa 50 buobas e buobs, ma er dals responsabels dal chor.

Nov president per la SRG SSR Svizra Rumantscha

La radunanza generala ha elegi Vincent Augustin unanimamain sco nov president. Dr. iur. Vincent Augustin ha 62 onns e stat a Mon. El ha tranter auter presidià durant 9 onns la Lia Rumantscha. Enfin il 2015 è el ultra da quai stà mainafatschenta da santésuisse Grischun e dapi quatter onns è el commember da l'Autoritad da recurs independenta davart radio e televisiun, AIRR, u per tudestg UBI. Questa presidescha Vincent Augustin dapi il 2016. Cun sia tscherna sco



Oscar Knapp (a sanestra) da Scuol che ha presidià la SRG.R ils ultims sis onns surdat la fin da l'onn l'uffizi a Vincent Augustin da Mon.

president da la SRG SSR Svizra Rumantscha vegn el però a dar giu quel presidi.

Vincent Augustin surpiglia il presidi SRG.R l'entschatta da schaner 2019. Sco president d'ina societad purtadra regiunala fa el part dal cussegl d'administraziun naziunal

da la SRG SSR a Berna che vegn presidià da Jean-Michel Cina.

Ad Oscar Knapp, che sto remetter ses uffizi tenor statuts la fin da l'onn 2018 cunquai ch'el accumplescha 70 onns, è vegni dà in «adia» cun in chor ad hoc.

Inscunter annual da la famiglia SRG.R



1



2

1 Suenter la laudatio dal cusseglier naziunal Martin Candinas e la surdada dal premi SRG.R 2018 è il Chor d'affons Sumvitg sa pustà per la fotografia da regurdientscha avant il Plantahof a Landquart.

2 Gilles Marchand (segund da sanestra), directur general SRG SSR, e Jean-Michel Cina (a dretga), president SRG SSR, han engrazià ad Oscar Knapp, il president partent, e gratulà a Vincent Augustin, il nov elegi president SRG.R.

3 In chor ad hoc da collavuraturas e collavuraturus da RTR sut la direcziun da Flavio Bundi è sa preschentà cun ina surpraisa musicala: in medley da chanzuns popularas che han regurdà Oscar Knapp a sias staziuns professiunalas per l'entir mund enturn.

PS: La proxima radunanza generala da la SRG.R ha lieu ils 15 da zercladur 2019.



3

«Mes nom es David Spinnler – restai pachifics!»

Suenter prest 20 onns RTR spetga uss ina nova incumbensa sin mai, quella dal manader dal parc da natira Biosfera Val Müstair.

Il tshiev siglia amez la via – pauc toc davant l'auto. Per fortuna na charresch jau betg uschè spert e poss sviar. Curt suenter: in tshiev chapital cun cornas da bellezza, gist sper la via, sco ina statua. Per fortuna stat el airi. E gia sun jau sperasvi sin la via cuverta da naiv. Mia concentraziun: plitost sin quai che pudess anc star sper la via. Mes patrats èn tar la radunanza communal che jau hai frequentà sco reporter. Tge è propi l'impurtant? Co fatsch jau mia contribuziun? Quella sto esser finida anc durant la notg – online e per il radio per las emissiuns da la damaun. Jau sun stanchel e decid da ma fermar e far ina curta pausa. L'aria è frestga, in bellezza tshiel da stailas sur il Parc Naziunal. Mes zoo nocturn. Adina cura che jau turn a chasa tard da la lavur.

Quai che quinta

Quantas debattas hai jau següi? Quantas sairadas en hallas polivalentas da tut l'Engiadina, da la Val Müstair, da la Bregaglia, dal Puschlav? Intervistas cun glied che aveva gust da dar in'intervista. Intervistas cun glied che na vuleva pli gugent betg dar intervistas. Intervistas cun campions olimpics e campionesas mundialas, cun cusseglieras e cussegliers federals e guvernativs. Ma surtut: intervistas cun personas sco ti ed jau. Era sch'in microfon u ina camera na procura betg gist per ina relaziun stretga: jau hai gi inscunTERS profunds. Muments che restan en memoria, films che jau poss clamar giu en mes tscharvè. RTR na vul betg far schurnalisse da sensaziuns, mabain rapportar da las chaussas impurtantas per noss public. Quai che quinta en la vita da mintgin. Savens

è quai decent e betg ina sensaziun che cloma al lieu era las grondas medias naziunalas. L'inscunter cun il chatschader che viva sia passiu dapi 63 onns. L'hotelier che na chat-nagina successiu per ses hotel, manà da la famiglia dapi decennis. In giuven ed ina giuvna che vulan daventar profis da tennis. Vischnancas che fusiuneschan etc., etc.

La nostalgia

En memoria restan dentant era reportaschas sco quella davent dal pilaster da la nova punt da Tarasp, cun la camera passa 60 meters sur l'En. Cun la schanuglia che tremblava. E bleras istorgias dramaticas: la mort dals peschs en il Spöl. Las investigaziuns da la WEKO en l'Engiadina dal 2012 e gist ussa la publicaziun dals resultats da la cumissiun da concorrenza. Las vatgas mortas perquai ch'ellas avevan mangià zaidlas da fier dad ina maschina da pulir da l'eroport a Samedan. L'iniziativa cunter abitaziuns secundaras. La crisa da l'euro e las sfidas per il turissem. Las nursas da Tumasch Planta e tut ils virivaris pervia da la vaccinaziun encunter la malsogna da la lieunga blava, e bler auter pli.

E lura: la bova da Bondo. In eveniment gigantesc. In eveniment che pretendeva era bler dad in schurnalist. Per betg esser memia datiers. Per betg perder la survista. Ma surtut: per far in schurnalisse uman. Sper tut las dumondas criticas che tutgan latiers. Bondo ha mussà a mai che schurnalisse na sto betg mo esser critic, fair e vardavel. Schurnalisse sto er esser uman.

L'ultim bitsch

Prest 20 onns tar RTR, per mai in temp grondius: Battaporta cun



A Caira (sura) è David Spinnler tranter auter stà responsabel per la redacziun dal «Battaporta», ed ils ultims 10 onns ha el manà la redacziun RTR en l'Engiadina e rapportà d'occurrènz ed eveniments sco per exempel onn per onn dal maraton da skis (a dretga cun il collega Armon Schlegel)

rock'n'roll, temas giuven ed ils open airs. Perfin emissiuns directamain da Bristol avain nus realisà quella giada. Schurnalisse d'infurmaziun cun tut sias fassetas: moderar magazins d'infurmaziun, far contribuziuns da radio e televisiun e pli tard adina pli intensivamain era crear cuntegns online e per social media. E surtut: ils ultims 10 onns en la regiun Engiadina e las vals dal sid. Jau hai fatg enorm gugent mia lavur tar RTR per Vus. Mintga singul di.

Ed ussa pudais tschentiar en il computer u tshertgar spert il disc da Pe-

arl Jam dal 1999 u la single cun il toc Last Kiss. Last Kiss è en sazez da Wayne Cochran, dentant: la versiun da Pearl Jam dal 1999 è simplamain grondiusa – gist per dir adia – in ultim bitsch musical per Vus.

Sche Vus essas pronts per smatgar play – fatsch jau la moderaziun finala – sco avant quasi 20 onns tar il Battaporta: «Mes nom es David Spinnler – restai pachifics!» (Ussa smatgar play!)

David Spinnler, enfin la fin da matg producent Engiadina

Tge fa atgnamain l'assistenta da direcziun RTR?

Mia carriera en chasa RTR hai jau cumenzà sco imprendista commerciala. Dapi trais onns m'occupesch jau ussa cun agendas, emprendistas ed emprendists e preschentaziuns.

L'emprendissadi commercial tar RTR è fitg varià e dat la pussaivladad da survegnir in'invista en tut las partiziuns administrativas da l'interpresa, quai vul dir en il secretariat da direcziun, en il retschaviment, en il marketing e la comunicaziun, en la partiziun da persunal, en las finanzas ed en il secretariat da program. Damai che RTR è pitschen e famigliar ves'ins era co ch'ìls e las collegas fan radio, televisiun e purschidas online. Suentar l'emprendissadi hai jau già la chaschun da restar tar RTR, l'emprim sco referendaria e pli tard sco responsabla dal secretariat da program. Jau hai profità fitg da pudair rimnar già uschia baud experientschas da manar in team, era sch'i n'è betg adina stà simpel dad «esser scheffa».

Avair la survista ed enconuscher ils connexs

Il 2015 hai jau puspè già la chaschun da far ina midada interna. Ladina Heimgartner, nossa directura, tschertgava in'assistenta ed jau hai già il cletg da vegnir tschernida. Tar mias lavurs principalas tutgan tranter auter l'organisaziun dal chalendar da la directura. Quai tuna simpel, ma i po esser ina detga sfida, cunzunt cura ch'igl è da fixar termins cun pliras personas. Autras lavurs èn preparar ed organisar sedutas, scrire protocols, manar correspundenza, organisar ils guides en chasa e tegnair à jour la glista cun las adressas dals abunents dals ACCENTS ed ils contacts che las collavuraturas ed ils collavuratur dal program dovran per lur lavur da mintgadi. Ina da mias lavurs preferidas è da preparar preschentaziuns



Ina da las lavurs d'Andrina Caprez (a sanestra) è la tgira e la furmaziun da las emprendistas commercialas.

da powerpoint e da prezi. Qua poss jau esser creativa e preschentar ils messadis e las infurmaziuns en visualisaziuns e maletgs. In'otra lavur che jau fatsch gugent e ch'è impurtanta per mai è la tgira dals emprendists commercialas e da las emprendistas commercialas. Jau emprov da dar vinavant ad els uschè bler da mia savida sco pussaivel e da tuttina laschar far els lur atgnas experientschas. Ina buna part da las lavurs vegn era dictada da l'actualitad dal di che po midar mes plan da lavur dad in mument a l'auter. Fitg impurtant è d'avair la survista, da vesair ed enconuscher ils connexs tranter ils numerus projects e las differentas incumbensas. Per ma perfecziunar visit jau actualmain sper la lavur la scolaziun sco assistenta da direcziun cun certificat professional federal.

E per il futur ma legrel jau vinavant

sin numerus contacts, interessants projects ed emprendists ed emprendistas che bandunan nossa chasa cun in diplom en giaglioffa – e forsa

che jau hai insacura era sut control-la l'agenda da la directura RTR.

Andrina Caprez,
assistenta da direcziun

Giubileums da fatschenta

Zercladur 2018

Giusep Giuanin Decurtins - 35 onns
Gabriela Desax - 35 onns
Jachen Prevost - 35 onns
Erwin Ardüser - 25 onns

Avust 2018

Gian Ramming - 15 onns
Armin Gruber - 10 onns
Angela Hendry - 10 onns
Gian Carlo Candinas - 5 onns
Oceana Galmarini - 5 onns
Gian-Marco Maissen - 5 onns

Partenzas

Fin d'avrigl 2018

Anton Derungs

Fin da zercladur 2018

Carlo Albin
Daniela Derungs

Fin da fanadur 2018

Roger Alig
Reto Derungs

Cordiala gratulaziun e grazia fitg per la lavur e la fidaivladad.

«Jau hai senti ch'igl è il dretg mument da bandunar RTR»

Avant 17 onns ha Roger Alig cumenzà sco redactor da sport tar RTR, ed ussa turna el puspè en sia professiun oriunda.

En chasa RTR datti sulettamain in ressort specialisà, quel dal sport. La redacziun tgira il contact cun ils atlets, rapporta d'eveniments pitschens e gronds ed infurmescha noss public da tut quai che capita en il mund da sport – da Trun fin Tokyo. Bainprest ha il redactor da sport Roger Alig ses ultim di da lavur en chasa RTR. Erwin Ardüser ha discurre cun el davart motivaziun, svilup ed ils numerus inscuters ch'el ha gi durant ils ultims onns.

Pertge has ti midà a ses temp da la scola tar RTR?

Cunquai che jau hai adina gi gust dal sport e da la lingua, è la piazza sco redactor da sport tar RTR stada ina schanza d'emprender insatge nov e da ma sviluppar persunalmain e professiunalmain.

Tge inscuters ed eveniments vegnan a restar en memoria?

En emprima lingia ils inscuters cun sportistas e sportists, cunzunt quels cun «noss» atlets grischuns. En spezial la generaziun dad aur dals passlungists rumantschs enturn Dario Cologna, ma er il mountain-

biker lumnezian Nino Schurter. Nagina medaglia n'ha fatg tant plaschair a mai sco sia medaglia dad aur als gieus olimpics a Rio. Uschia hai jau era gist respundi a la segunda part da la dumonda. Gieus olimpics èn la curuna dal sport per mintga atlet ed uschia sa chapescha adina era puncts culminants en la vita d'in reporter da sport – e quai malgrà tut ils aspects negativs che occurrenzas d'ina tala dimensiun han. Grond plaschair hai jau dentant er adina gi dals bellezza eveniments regulars en il Grischun sco il Maraton da skis engiadinais, il Swissalpine a Tavau u las cursas spectacularas Transruinaulta e Transviamala.

Co è sa sviluppada durant quels onns la lavur da la redacziun da sport da RTR?

La lavur fundamentala è restada. Bun schurnalissem – era quel da sport – dovra en emprima lingia interess per las persunas e per lur istorias. I dovra reporters cun mirveglias, cun ina buna savida dal fatg e cumpetenza per la materia. Buns commentaris live basegnan eloquenza, buns artitgels e bunas con-

tribuziuns pretendan in tshert dun linguistic. Bler è dentant sa midà en quai senn ch'il sector online daventa adina pli impurtant.

Vegn ti er a restar collià en il futur cun il sport, forsa era cun il schurnalissem?

Il sport è stà ils ultims bunamain dus decennis mia lavur e mes hobi. Davent dad uss è el en emprima lingia «mo» pli hobi, en spezial passlung e curre, mes dus sports preferids en il temp liber. Igl è bain pussaivel che jau sun ina giada u l'autra anc activ sco schurnalist da sport independent, ma quai fiss lura plitost hobi che lavur.

Tge vegn a mancar a tai il pli fitg da la lavur en chasa RTR?

Mias collegas e mes collegas, betg mo tar RTR, mabain era da las autras unitads da la SRG SSR. En il decurs dals onns èn blers collegas da las redacziuns da sport da SRF, RTS e RSI daventads amis. Mo era tranter sportists, trenaders, funcziunaris ed organisatur datti bleras persunas che jau apprezzesch. Jau hai ina gronda rait da contacts e quella vulesch jau -

en tge furma adina - tgirar er en l'avvegnir.

A partir da l'avust stas ti puspè sco magister primar davant ina classa. Cun tge sentiments fas ti quai?

Tuttina sco in sportist sto sentir, cura ch'igl è il gist mument da terminar la carriera, hai era jau senti ch'igl è ussa il dretg mument da bandunar RTR. Jau return cun plaschair tar mias ragischs professiunalas. Tuttina èsi ina nova entschatta. Jau na sai betg simplamain avrir il truchet e lavurar cun il material da pli baud. Quel hai jau dismiss – e quai è era bun uschia. Jau ma legrel sin uffants averts e sin lur rir, ma legrel da parter lur quitads e plaschairs e da laschar profitar els da mia experienscha da vita. Mo fitg impurtant è era che mia famiglia sa legria che jau sun en il futur pli savens a chasa e na lavur betg pli durant trais da quatter fin d'emnas sco quai ch'in schurnalist da sport fa savens.

Roger, grazia fitg per quest discours e per tes engaschament en favur dal sport e da RTR. Nus giavischain tut il bun per tes futur professiunal e privat.



Sco redactor da sport è Roger Alig sa muventà sin ils champs da sport locals ed internaziunals. Uschia ha el per exempel era rapportà per RTR il 2014 dals gieus olimpics da Sotschi (a sanestra) ed il 2017 dal success dal mountainbiker Nino Schurter a Lai.

RTR – cun la rulotta als festivals grischuns

Open air vul dir tenda, musica e festas che pon ir enfin la damaun. E lura datti era quels che fan schizunt festa da venderdi fin dumengia.

Open air vul savens dentant era dir: spetgar, betg savair tge far e chillar pli u main patgific en tenda. Savens manca in lieu per star patgific, giugar gies e tadlar musica. Perquai visita il team da festivals RTR cun ina rulotta dals onns 80–850 kilos, 2 sin 4,5 meters, bler scharm e pauc luxus – quatter open airs grischuns:

- 16 da zercladur, Arcas Rock, Cuira
- 22 e 23 da zercladur, Open Air Sur l'Aua, Casaccia
- 19 fin 21 da fanadur, Open Air Lumnezia, Degen
- 3 e 4 d'avust, ROCKseDRUN, Se-drun

Vus giais ad in da quels festivals?

Lura vegni en la rulotta a star patgific, far gies e dar ina baterlada. Ella è averta per in e scadin, e quai era la saira durant ils concerts. Là dentant

cun in'offerta speziala. Tranter giugaders dad UNO e chillers moderscha Livio Chistell live or da la rulotta e discorra cun ils preschents. E sa chapescha ch'i dat era d'udir la musica dals festivals. Quai tut al Radio Rumantsch, adina da las 19:00 fin las 23:00 – e da l'Open Air Lumnezia gia a partir dal suentermezdi.

E davant la rulotta, sco che quai tutga tar il campar, in curtin cun giaschaditschs e gies.

Quai che gira e marscha enturn la rulotta e durant ils festivals preschenta nus en las raits socialas sco era sin rtr.ch cun

- tuns dad auta qualidad
- videos en color
- texts nair sin alv

Tge manca en nossa rulotta?

Avais Vus in poster dals Backstreet Boys che Vus na duvrais betg pli



Cun questa rulotta visitan Gian Marco Maissen (sanester) e Livio Chistell questa stad differents festivals da musica en il Grischun.

u in'autra legra sgnocca per decorar la rulotta da RTR? Avais Vus in tip co far anc pli patgifica nossa rulotta? Lura As annunziai sut bat-

taporta@rtr.ch u purtai gist spera via la rauba al festival che Vus visitais.

Gian Marco Maissen,
redactor Battaporta

RTR SIL PUNCT

L'INFURMAZIUN CUMPACKTA DURANT LA STAD
DALS 02-07 FIN ILS 17-08-2018

GLINDESDI FIN VENDERDI
A LAS 17:45 SIN SRF1 E SIN RTR.CH

Deutsche Untertitel TXT 777

RTR sil punct

Tge fa il svilup?

Il svilup s'occupa da damaun! Uschia tuna la definiziun programmatica da la nova partiziun ch'i dat dapi quest onn tar RTR.

Da Gian Ramming, schef svilup



S'occupa da la retschertga e maina la partiziun svilup: Gian Ramming.

Tgi ch'è gia s'occupà in giada in pau pli a fund cun eventuals svilupps dal futur po mo confermar l'antica sabientscha: far prognosas è ina fatschenta spinusa, surtut sch'ellas regardan l'avegnir! Savens capita quai, cun il qual ins n'ha betg fatg quint.

Lura bain! Però a tge servan questas revelaziuns? A midar perspectiva! Betg sa dumandar tge che vegn ad esser nov en dus, trais, tschintg u diesch onns. Mabain sa dumandar

tge che na vegn betg a sa midar ils proxims onns. Quai ha l'avantag ch'ins stat sin in fund stabel per guardar sin il mund che sa mida, ed integrescha las midadas da maniera che quai che resta, resta bun.

Ed ussa? Tge pomai pudess esser tar RTR questa constanta che perdura e resista a tut las midadas? Cler e net: raquintar istorgias! Er en diesch onns vul il public tadlar e guardar istorgias divertentas, infurmativas, originalas e revelaturas or dal mund politic, economic, cultural, or dal mund dal sport e quel dals «faits divers». Pertge che quai e segir? Perquai ch'il homo sapiens fa quai dapi millis e millis dad onns.

Quai che sa mida dentant è la disa da consumar: Cura, nua, quant ditg? Tge, ed en tge furma? E prefereschan tuts il medem? Cun quest ge-

ner da dumondas s'occupa la partiziun svilup.

Retschertga

Nus essan londervi da concepir e sviluppar novs instruments per vegnir a savair pli precisamain tge che plascha a noss public, nua ch'el ha dubis, tge che na plascha betg, tge

ch'è memia lung, memia curt, memia lungurus e tge che manca. Quai è l'incumbensa da la retschertga. Ils resultats èn la basa per il svilup dal program. En il medem mument servan quests novs instruments a controllar, sche nossas analisas e decisions èn propi stadas bunas, e sch'ellas han chattà il public.



Il stab sustegn e mantegn: Claudine Cavegn, Gian Claudio Caprez, Tanja Derungs e Selina Huonder.

Stab

Insatgi sto mantegnair la survista da las activitads da la partiziun svilup. Ed insatgi sto sustegnair las differentas sutpartiziuns. Quai, e bler auter fa il stab. El sustegna, organisescha, planisescha, protocolle-

scha, controllescha ed admonescha. Ed el maina ensemen cun producentas e producents projects e fa in mantun lavur per il program. Curt: il stab è fantschella per bler.



Guardan tranter auter per il funcziunament en la rait da RTR: Umberto Camathias e Sandro Spreiter.



Tschertga vias futuras per avrir RTR al public creativ: Michel Decurtins.



Coordinescha tranter las unitads d'interpresa da la SRG SSR: Renè Spescha.

Barat, innovaziun e tecnica

In'otra incumbensa è quella da perseguir il svilup da furmas e cuntegns tar noss collegas a Turitg, a Lugano ed a Geneva. Tge fan els, tge datti d'emprender, tge pudessan nus surpigliar, tge barattar? Cun eglis averts persequitain nus era tge che capita sin plattafurmas e raits multimedialas. Qua sa preschenta tut il mund da producents e producentas da cuntegns audiovisuals:

Tge ha success? Tge datti nov or d'in punct da vista formal, or d'in punct da vista tecnologic, cun tgi pudess RTR collavurar u schizunt sviluppar da cuminanza cuntegns?

Quai è surtut il champ dal coordinatur interregional, da l'innovaziun e dals webmasters che procuran per il funcziunament da la pagina rtr.ch e per las premissas ch'il program po realisar sias ideas.

Tge gidan tut ils svilupps, tut l'innovaziun, tut la nova tecnologia, sch'i na dat nagin che dumogna cuntegn, furma e tecnologia? Perquai vegn mintga persuna che vegn en chasa scolada ed accumpagnada ils emprims mais, e mintga persuna ch'è gia en chasa ha la pussaivladad da sa perfecziunar. Tge abilitads dovri, tge scolaziun da basa dovran nossas collavuraturas e noss collavuratur, tge furmaziun sto suandar? Tge curs èn buns, tge curs ston vegnir remplazzads, nua chatt'ins quels curs e tge datti da nov en il sectur schurnalistic e tecnologic? Cun quai sa fatschenta la scolaziun e la furmaziun, ina lavur che pretenda in'a-



S'engaschan per il futur da scolaziun e furmaziun: Isabella Wieland e Prisca Bigliel.

bilitad da differenziaziun (a mintgin la dretga scolaziun/furmaziun) e che na prenda mai ina fin. Per il mument essan nus londervi d'establiir in sistem che garantescha la persistenza da quai che vegn intermedià en la scolaziun e furmaziun.

Il meglia ha plaschì a mai il contact cun il public ed ils collavuradors da RTR

Ils 2 d'avust 2015 hai jau cumenzà mes emprendissadi da commerzi tar RTR. Ed ussa ma chat jau gia en las ultimas preparativas per ils examens finals.

Ils trais onns d'emprendissadi èn passads svelts, fitg svelts. Durant quels onns hai jau dastgà lavurar en las differentas partiziuns da l'administraziun da RTR. L'emprim onn en la partizun logistica sun jau surtut stada responsabla per il material da biro; il segund onn hai jau mintgamai lavurà in di l'emna en las partiziuns finanzas, persunal e redacziun da musica; mes ultim onn passent jau en la partizun stab program, nua che l'administraziun e la spediun dals differents premis dals gieus al Radio Rumantsch è ina da mias incumbensas principalas.

Dal commerzi al sport

Durant l'emprendissadi hai era gi num da frequentar dus dis l'emna la scola professiunala Surselva a Glion. Tar ils differents roms da scolaziun tutgavan era rumantsch, tu-



Da la contabilitad fin en la redacziun da musica: durant l'emprendissadi commercial ha Selina Huonder lavurà en quasi tut las partiziuns da RTR.

destg, talian ed englais sco er istorgia, economia e dretg e contabilitad. Ils dis da scola èn per il solit emplenids cun bleras infurmaziuns no-

vas, ma igl ha – sco dapertut – era dà dis che ma parevan fitg lungs. Per la scola e per ils curs interdisciplinars hai jau scrit differentas lavurs da

project. Intginas hai jau scrit suletta ed autras avain nus fatg en grupp. Durant quels trais onns hai jau era gi la pussaivladad da far dus viadis da lingua: la stad 2017 a Cork en l'Irlanda e l'atun 2017 a Florenz en l'Italia.

Mes ultim di da lavur en chasa RTR hai jau ils 31 da fanadur 2018, ed il settember 2018 cumenz jau lura il studi da bachelor «Sport Management» a la HTW a Cuira.

Jau ma legrel fitg sin la nova sfida e da far novas experientschas sin il champ da sport.

Ma ussa ma concentresch jau sin il sprint final da mes emprendissadi da commerzi cun maturitad professiunala.

Selina Huonder,
emprendista commerciala

Tgi vegn – tgi mida



Samuel Sossai (*1995) ha cumenzà l'entschatta da matg 2018 sco redactur da novitads. Il 2018 lavura el en in pensum da 75%, a partir dal 2019 lura 100%. El vegn da Trun, ha fatg il gimnasi claustral a Mustér e finescha l'atun 2018 il studi da politologia e d'istorgia a l'Universitad da Turitg cun il bachelor.

Maya Capeder-Buchli (*1959) netegia dapi il matg 2018 il studio a Glion.



Valeria Cavelti (*1996) fa in praticum tar ils reporters radio dal matg fin l'avust 2018. Ella vegn da Trun, ha frequentà 3 onns il gimnasi da la scola claustral a Mustér e lura midà al gimnasi da sport a Tavau cun finir la scola commerciala. La fin da mars 2018 ha ella terminà sia carriera da passlung.



Anna Caprez (*1976) è dapi il matg 2018 producenta Engiadina.



Prisca Bundi (*1991) diventa a partir dal fanadur 2018 producenta Radio Rumantsch e resta dasperas reportera radio.



Pietro Jacomet (*1996) cumenza il fanadur 2018 in praticum tar ils reporters radio. Igl è previs ch'el restia suentar il praticum en in pensum irregular per lavurar durant las vacanzas da semester. El vegn da Rabiun, ha frequentà il gimnasi claustral a Mustér e fa actualmain il Bachelor of Arts a l'U-

niversitad da Turitg cun istorgia sco rom principal.



Nora Baltermia (*1998) rinforza la stad 2018 la squadra dals reporters radio.



Nina Defuns (*1996) ha cumenzà sia nova incumbensa sco moderatura dal Minisguard la fin da matg 2018.

Cordiala gratulaziun e bun'entschatta.

Top 5 RTR – mias emissiuns preferidas

Dario Müller ha 33 onns e lavura dapi il 2011 sco redactor da televisiun tar RTR en l'Engiadina. El abitescha cun sia dunna e sias dus figlias a Sent. Dal program RTR han plaschi bain ad el questas contribuziuns:

Livestreams da RTR

Its livestreams tar RTR èn franc ina plivalur per noss public. Era jau guard cun plaschair questas emissiuns. Sco Engiadinais m'interessan natiralmain ils derbis da hockey il pli fitg. Pudair persequitar sport regiunal en la televisiun sco tar ils profis - insatge grondius, surtut sch'il CdH Engiadina gudogna.

Dapli sin rtr.ch «ECH San Murezzan gudogna il derby grischun cunter CDH Engiadina» dals 10-2-2018.

«Nus vein aunc stizun»

Passentar in di en la stizun dal vitg a Surrein. Quai era l'istorgia dad Esther Berther en la «Marella». Quai che vegn segir a restar en memoria - Paula, la mattatscha da quatter onns, che dastga far cumissiuns persula. Oz betg anc surris? Alura dai, giai a tadlar!



Dapli sin rtr.ch «Nus vein aunc stizun» dal 1-4-2018.

Stars da musica tar Ivo Orlik

Tge tratg communabel han Lo & Leduc, Dabu Fantastic, Gustav e Bligg? Gea, els èn tuts musicists da num e da pum ord la scena da musica svizra. Dentant èn els era tuts stads giasts tar Ivo Orlik ed han chantà lur hits ensemen cun el en rumantsch. Simplamain top. Jau hai en mintga cas grondas mirveglias tgi che ristga sco proxim da visitar Ivo en il studio da radio.

Dapli sin rtr.ch «Lo & Leduc – Null-SiatNov» dals 6-4-2018.

L'archivar recumonda

Cun plaschair hai jau remartgà la rubrica «archivar» sin Play RTR.

Dals capricorns a Puntraschigna e Bernard Verdet, il chanastret in zic pli spezial, fin a la cursa da scarsoilas en Val d'Alvra. Tut quai ed anc dapli datti da fufragnar en noss archiv visual, in stgazi degn da vegnir scuvert. Bun divertiment er a Vus! Dapli sin rtr.ch/play/tv/tematicas/archivar

Vardad ubain manzegna?

Gia pli baud guardava jau fitg gugent la seria da televisiun «X-Factor - il nunchapibel». Ed ussa poss jau guardar questa emissium era per rumantsch. La redacziun da Battaporta ha numnadamain produci ina versiun rumantscha e quai cun Dominik Hardegger sco Jonathan Frakes. In'emissium uschè misteriusa sco l'original. Grazia che vus avais sveglià regurdanzas veglias. Jau ma legrelgia ussa sin la proxima episod. Dapli sin battaporta.ch, «X-Factor rumantsch: Davart datas» dal 1-5-18.

Cifras e fatgs 2017

(rtr) Sco chasa da medias electronica per la Svizra rumantscha porchas RTR 8'760 uras da radio e 107,1 uras da televisiun ad onn sco er in'offerta online. Persunas en passa 30 differentas professiuns lavuran tar RTR per realisar tut quels programs. Il pli grond public chatta il program dal Radio Rumantsch cun ina media da 75'000 auditor(a)s a di en l'entira Svizra. E tar la televisiun èsi l'emissium «Cuntrasts» cun en media 43'000 aspectatur(a)s per emissium.

Tut questas ed anc autras infurmasziuns èn da chattar en il flyer «Cifras e fatgs 2017». A moda cumpacta e survesaivla dat el in'invista actuala en ils secturs program, personal e custs da RTR. Numerusas graficas illustreschan en furma pregnanta las cifras ed ils fatgs da l'onn passà.

Ulteriurs exemplars dal flyer – ch'è er agiuntà a questa edizium dals Accents – pon ins retrair tar RTR. La versiun electronica stat a disposiziun sin rtr.ch.



Impressum

editura: Radiotelevisiun Svizra Rumantscha, 7000 Cuir

gremi editorial: Ladina Heimgartner (lh), Erwin Ardüser (ea), Johann Clopath (jc), Tamara Deflorin (td)

gremi redacziunal: Patrick Alig (pa), Erwin Ardüser (ea), Claudia Cathomen (cc), Johann Clopath (jc), Tamara Deflorin (td), Armin Gruber (ag), Ladina Heimgartner (lh), Daniel Wasescha (dw)

per questa edizium han era

collavorà: Vincent Augustin, Ralf Beer, Prisca Bigliel (pb), Flavio Bundi, Andrina Caprez, Flavio Deflorin, Flavio Huonder, Selina Huonder, Gian-Marco Maissen, Reto Martinelli, Marina Morgenthaler, Dario Müller, Madlaina Niggli, Fabio Pally, Gian Ramming, Valentin Schmed, René Spescha, David Spinnler, David Truttmann, Roger Tuor, Andreas Wieland.

grafica e cumposiziun: Johann Clopath

correctorat: Lia Rumantscha

stampa: Gammeter Media

datas da publicaziun: 4 giadas l'onn (mars, zercladur, settember, december)

edizium: 3'200 exemplars

contact: accents@rtr.ch, Radiotelevisiun Svizra Rumantscha, Via da Masans 2, 7000 Cuir tel. 081 255 75 75

Gugent resguardain nus Voss giavischs per ulteriurs abunaments, midadas d'adressa, e.u.v.

era sin: rtr.ch/accents

Il rumantsch è mia lingua preferida

Sper il rumantsch hai jau er ina affinitad per l'englais. E cun far in emprendissadi d'informaticher tar RTR hai jau pudì duvrar tant l'in sco l'auter.

Ils emprims mais da l'emprendissadi ha quasi mintga di purtà insatge nov: tut quels terms tecnics, in auter ritmus da viver che durant il temp da scola e lura er anc ils differents idioms che vegnan discurrìs en chasa RTR. In vair virivari! Ma gia sunter l'emprim mez onn aveva jau ina buna survista da quai che spetga mai durant l'emprendissadi, ed er il chapir ils collegas da l'Engiadina e dal Surmeir funcziunava adina meglier.

Ils emprims semesters sco emprendist d'informatica n'èsi betg pussaivel da far bleras lavurs autonomamain ed en atgna reschia. Quai è dentant sa midà il mument che nus

avevan gi las emprimas lecziuns d'informatica en scola professiunala e natiralmain era grazia a la buna introducziun che jau hai survegnì da mes collegas en chasa RTR.

La fascinaziun crescha ...

Durant il segund onn da mes emprendissadi hai jau era cumenzà cun il servetsch da helpdesk, q.v.d. jau m'occupava da tut ils problems e problemins tecnics che fatschantan collavuraturas e collavuratur da RTR durant lur lavur quotidiana. Questa lavur è stada in grond agid per emperder d'enconuscher fitg bain l'entira interpresa ed il medem mument er ils singuls collavuratur

da nossa chasa. Uschia è la fascinaziun per la tecnologia creschida di per di, e la finala hai jau cumenzà da realisar pitschens projects tecnologics per mai privat.

... e gia spetga la proxima sfida

Ils emprims trais onns da l'emprendissadi hai jau frequentà durant dus dis l'emna la scola professiunala, e l'ultim onn anc in di l'emna. Ultra dad ir a scola hai gi num far differents curs e lura sa preparar per l'examen final l'entschatta fanadur. En mia lavur a scrit sun jau dal reminent ma fatschentà cun l'installaziun e configuraziun d'in sistem

per visualisar infurmaziuns, in sistem che nus duvrain er en chasa RTR per infurmar sin moniturs plazzads en l'entira chasa las collavuraturas ed ils collavuratur davart servetschs ed uraris da la partiziun tecnica.

E gia spetga la proxima sfida. Sunter l'ultim examen ma legrel jau sin las vacanzas per lura cumenzar mia emprima piazza. Jau na stoss per cletg betg far gronda midada. Mes nov patrun da lavur è numnadamain mes vegl: a partir da l'avust lavur jau sco informaticher tar RTR.

Fabio Pally,
emprendist informatica

Mariano Tschuor – president da la Fundaziun Focal

(rtr) En il decurs da sia scolaziun e da sia carriera professiunala sco dramaturg, moderatur, redactur, manader da program, schefredactur, directur RTR e la finala sco commember da la direcziun generala da la SSR ha Mariano Tschuor (60) acquistà ina vasta invista en il sector da medias. El surpiglia la nova incarica l'entschatta 2019.

Ina da las incumbensas principalas da Mariano Tschuor è quella da rinforzar e sviluppar vinavant questa fundaziun ch'è unica en l'Europa. Ella garantescha che persunas engaschadas en il sector da film e d'audiovisiun disponan er en il futur d'ina plattafurma effizienta per



la scolaziun e per la tgira da contacts.

Bernard Maissen – vicedirectur da l'UFCOM/BAKOM

(rtr) Cumenzà sia carriera schurnalistica ha Bernard Maissen (57) tar la «Bündner Zeitung». Sunter plirs onns tar l'Agentura telegrafica svizra ATS/SDA, nua ch'el è stà correspondent per il Grischun e pli tard schef da la redacziun tudestga, ha el midà il 2003 sco schefredactur tar il Radio Rumantsch. Dus onns pli tard è el turnà tar l'ATS/SDA, e quai sco schefredactur e commember da la direcziun. La fin da l'onn passà ha el bandunà l'interpresa. L'emprim da matg ha el cumenzà sia nova incumbensa tar l'Uffizi federal da comunicaziun ch'è tranter auter responsabel per la repartiziun da las taxas da radio e televisiun e per



la controlla da las concessiuns da radio e televisiun en Svizra.

CONCERT SIN GIAVISCH

MINTGA DUMENGIA A LAS 11:00

La rusna da stad? – Nua?

La stad è medialmain in temp cun in'agenda pli leva, in temp dad ir autras vias che durant il rest da l'onn. E quai fa RTR era quest onn cun in program spezial.

Infurmaziun curta, frestga e sin il punct, per exempel l'emissiun da televisiun «sil punct». Quella infurmescha e tegna al current era durant la stad. Tras l'emissiun mainan Livio Foffa, Oceana Galmarini, Corina Schmed ed Isabella Wieland. A moda frestga e cumpacta vegn rapportà da quai che capita la stad en il Grischun. «sil punct» vegn emess dals 2 da fanadur fin ils 17 d'avust 2018 da glindesdi fin venderdi a las 17:45 sin SRF1. L'emissiun datti adina e dapertut era sin rtr.ch, las plattafurmas socialas ed en l'app Play RTR.

In program per il cor

Per exempel cun l'emissiun «Mia vita – mia musica» che substituescha durant la stad l'emissiun «Profil». En mintga emissiun vegn in giast a preschentar sia musica, vul dir ils tocs che han già ina muntada speziala en sia vita, che al han accumpagnà en bels e trists muments, las chanzuns che stattan a cor ad el. Mintga sonda a las 09:03 en il Radio Rumantsch.

A la scuverta da lieus pauc enconuschents

Per exempel Putz ubain Buseno. Durant la stad vegn RTR a scuvrir lieus en il Grischun che n'èn betg mintga di en il focus. Tge capita insumma a Putz en Partenz? E tgi èn ils abitants da Buseno en il Mesauc? Respostas e las istorgias da quests lieus pauc enconuschents datti mintga di en il program dal RR.

In program per l'olma

Per exempel cun l'emissiun «Vita e cretta» che vegn a reprendre durant la stad tematicas discutadas ils davos onns en l'anteriura emissiun «Forum», en la quala experts han referì davart tematicas religiusas ed etic-filosoficas.



Judith Schnider da Zignau, qua cun ses dus figls Michael e Benjamin durant in'emprova da la Societad da musica Sumvitg/Cumpadials, è ina da las protagonistas da la seria «Nus essan la Svizra» che vegn mussada questa stad en ils «Cuntrasts».

Mintga dumengia a las 08:03 en il Radio Rumantsch.

In program per emprender d'enconuscher la Svizra

Per exempel cun l'emissiun «Cuntrasts». Sut il titel «Nossa Svizra» mussa l'emissiun duas serias en duas parts. L'emprima part mussa quatter films documentars dals collegas da la RSI, ina seria panoramica tranter auter davart glatschers, chavorgias u fradaglias. En la segunda part ina seria cun il titel «Nus essan la Svizra» che purtretescha persunas sco ti ed jau e lur mintgadi en tut las quatter regiuns linguisticas dal pajais.

Mintga dumengia a las 17:25 sin SRF1.

Kino per las ureglias

Per exempel cun la «Marella». Quella repeta emissiuns remartgablas dals ultims trais onns – emissiuns ch'èn s'approfundadas en tematicas istoricas, culturalas u economicas.

Mintga dumengia a las 09:03 en il Radio Rumantsch.

RTR direct sin chamona e sin las Maledivas

L'entir program da stad da RTR è sa chapescha sco adina accessibel online (tut tenor abunament dal telefonin) da las splagias da las Maladivas fin sin il giaschaditg sper chamona.

Tut cumplet, adina e dapertut, direct u cun temp e peda sin rtr.ch, sin las plattafurmas socialas ed en l'app Play RTR.

Ina bella stad cun RTR giavischan

Valentin Schmed, manader actualitad, e David Truttmann, producent reflexiun





Scola d'Alvaschagn 1904, fotografia da Lucretia Balzer-Augustin.

Manual nossaistorgia.ch →

La piattaforma www.nossaistorgia.ch è avverta a privats, instituziuns, scolas e medias. Ils utilisaders han la pussaivladad da deponer fotografias, films, videos, registraziuns da tun e documents actuals u istorics da noss chantun. Uschia èsi pussaivel da rimnar funtanas e d'aprofundar temas da l'istorgia da la Svizra rumantscha e dal Grischun.

Per dumondas:
nossaistorgia@rtr.ch
 081 255 75 75

Nossaistorgia.ch – l'archiv public dal Grischun!

Grazia a numerus novs commembers è l'arcun da nossaistorgia.ch – che vegn tgirà da RTR – s'emplenì ils ultims mais cun bler material istoric.

Co ha il conscolar num che se-seva en il banc da scola cun mai en la terza classa? Tgi era propi quest scolast en la sisavla primara, quel cun barba che veseva ora in pau sco in hippi dal 68? Tge scolara ha bandunà nus sunter la segunda secundara ed è ida giu la Bassa? Dumondas sin dumondas. Dumondas, a las qualas ins chatta magari repostas sin la piattaforma digitala www.nossaistorgia.ch. Là pudais Vus chargiar si Vossas fotografias veglias da scola u commentar fotografias ch'èn gia sin la piattaforma. Tgi sa per exempel co ch'il pader da la scola d'Alvaschagn sin la fotografia qua sura aveva num? E tgi eran ils dus magisters che fan ina

tschera brutta davostiers da vart dretga? En il dossier «Nossas scolas» chattais Vus fotografias da classas, ma er auter material en connex cun la scola vegn deponì en questa rubrica sin la pagina www.nossaistorgia.ch. Per exempel er ina fotografia da la chasa da scola da Laax dals onns 1960 u da la chasa da scola da Mustér en il stadi da construcziun. E co veseva il «Schulzeugnis» da Maria Wenzin da Platta ora il 1904? En ils roms «religiun» e «leger» va ella cun la plima (vesair foto).

Flavio Huonder,
 curatur nossaistorgia.ch
nossaistorgia@rtr.ch

Schulzeugnis

für Maria Wenzin Schülerin v. Platta

Betragen	Fleiss	Fortschritte	Bemerkungen
<i>empfohlen</i>			
Leistungen:			
Religion	<i>empfohlen</i>	<i>empfohlen</i>	
Lesen	<i>empfohlen</i>	<i>empfohlen</i>	
Grammatik	<i>empfohlen</i>	<i>secunda</i>	
Aufsatz	<i>empfohlen</i>	<i>secunda</i>	
Sprache			
Memoriren	<i>empfohlen</i>	<i>empfohlen</i>	
Zifferrechnen	<i>empfohlen</i>	<i>secunda</i>	
Kopfrechnen	<i>empfohlen</i>	<i>secunda</i>	
Geometrie	<i>empfohlen</i>	<i>secunda</i>	
Buchhaltung			
Geographie	<i>empfohlen</i>	<i>prima</i>	
Geschichte	<i>empfohlen</i>	<i>prima</i>	
Naturlehre	<i>empfohlen</i>	<i>secunda</i>	
Zeichnen	<i>empfohlen</i>	<i>empfohlen</i>	
Schönschreiben	<i>empfohlen</i>	<i>empfohlen</i>	
Gesang	<i>empfohlen</i>	<i>secunda</i>	
Weibliche Arbeit			
Tarven		<i>empfohlen</i>	
<i>Reparatur</i>			

Versäumnisse: entschuldigt *3*, unentschuldigt *2* Tage.

Platta, den 29. März 1904

Bundl. P. Mendl

Zu haben bei Moriz Maggi, Papierhandlung, Ilanz.

Attestat da scola da Maria Wenzin da Platta 1904, document da Ciprian Giger da Pardé.

MANUAL

CO MET JAU INA FOTOGRAFIA SIN LA PAGINA NOSSAISTORGIA.CH?

Tier dumondas:
nossaistorgia@rtr.ch
081 255 75 75

QUAI DOVR JAU



in computer



in'adressa dad e-mail



access a l'internet



fotografia digitalisada



avrir in conto personal
sin nossaistorgia.ch

E GIA VAI LIBER

- 1 avrir la pagina www.nossaistorgia.ch
- 2 cliccar sisum dretg sin **Agiuntar in document**
- 3 integrar la fotografia sut **Metter qua**
- 4 dar in titel sisum
- 5 data da la foto (p.ex. 1954)
- 6 autur (tgi ha fatg la foto)
- 7 lieu (p.ex. Landquart)
- 8 curta descripziun (text tar la fotografia) giudim
- 9 alura **Publitgar**
- 10 tags/chavazzins (p.ex. scola, chasa, nair ed alv, enviern)
- 11 Licenza cliccar (p.ex. tut ils dretgs resalvads)
- 12 **Publitgar**
La fotografia è ussa sin nossaistorgia.ch

CHARGIAR SI LA FOTO

The screenshot shows the website's interface for uploading a photo. It is divided into two main sections. The top section shows the initial upload step where a user can click 'Agiuntar in document' (1) and then 'Metter qua' (3) to upload a photo. The bottom section shows the form for adding metadata to the photo, including a title (4), date (5), author (6), location (7), and a short description (8). On the right side, there is a 'Publitgar' (9) button and a 'Licenza' (11) dropdown menu. Below the photo, there are fields for 'Tags/chavazzins' (10) and a 'Publitgar' (12) button. The interface is clean and user-friendly, with clear instructions and numbered steps.

RTR – LAS EMISSIONS DAL RADIO RUMANTSCH

versiun matg 2018

	glindesdi	mardi	mesemna	gievgia	venderdi	sonda	dumengia
00:00	SRF Novitads	SRF Novitads	SRF Novitads	SRF Novitads	SRF Novitads	SRF Novitads	SRF Novitads
00:03	Grischun sonor	Grischun sonor	Grischun sonor	Grischun sonor	Grischun sonor	Grischun sonor	Grischun sonor
01:00	SRF Novitads	SRF Novitads	SRF Novitads	SRF Novitads	SRF Novitads	SRF Novitads	SRF Novitads
01:03	Sat R classica	Sat R classica	Sat R classica	Sat R classica	Sat R classica	Sat R classica	Sat R classica
03:00	SRF Novitads	SRF Novitads	SRF Novitads	SRF Novitads	SRF Novitads	SRF Novitads	SRF Novitads
03:03	Grischun sonor	Grischun sonor	Grischun sonor	Grischun sonor	Grischun sonor	Grischun sonor	Grischun sonor
04:00	SRF Novitads	SRF Novitads	SRF Novitads	SRF Novitads	SRF Novitads	SRF Novitads	SRF Novitads
04:03	Musica populara	Musica populara	Musica populara	Musica populara	Musica populara	Musica populara	Musica populara
05:00	SRF Novitads	SRF Novitads	SRF Novitads	SRF Novitads	SRF Novitads	SRF Novitads	SRF Novitads
05:03	Musica populara	Musica populara	Musica populara	Musica populara	Musica populara	Musica populara	Musica populara
06:00	Novitads	Novitads	Novitads	Novitads	Novitads	Novitads	Novitads
06:06	Actual la damaun	Actual la damaun	Actual la damaun	Actual la damaun	Actual la damaun	Actual la damaun	Dumengia la damaun
06:30	Novitads Meteo	Novitads Meteo	Novitads Meteo	Novitads Meteo	Novitads Meteo	Novitads Meteo	Novitads Meteo
06:40	Impuls	Impuls	Impuls	Impuls	Impuls	Impuls	Impuls
06:50	Revista da medias	Revista da medias	Revista da medias	Revista da medias	Revista da medias	Revista da medias	Revista da medias
07:00	Novitads	Novitads	Novitads	Novitads	Novitads	Novitads	Novitads
07:06	Actual la damaun	Actual la damaun	Actual la damaun	Actual la damaun	Actual la damaun	Actual la damaun	Highlights da l'emna
07:30	Novitads Meteo	Novitads Meteo	Novitads Meteo	Novitads Meteo	Novitads Meteo	Novitads Meteo	Novitads Meteo
07:40	Kikeri6	Kikeri6	Kikeri6	Kikeri6	Kikeri6	Kikeri6	Highlights da l'emna
07:50	Revista da medias	Revista da medias	Revista da medias	Revista da medias	Revista da medias	Revista da medias	Revista da medias
08:00	Novitads	Novitads	Novitads	Novitads	Novitads	Novitads	Novitads
08:06	Actual la damaun	Actual la damaun	Actual la damaun	Actual la damaun	Actual la damaun	Actual la damaun	Vita e cretta
08:30	Novitads Meteo	Novitads Meteo	Novitads Meteo	Novitads Meteo	Novitads Meteo	Novitads Meteo	Novitads Meteo
08:40	Il chavazzin dal di	Il chavazzin dal di	Il chavazzin dal di	Il chavazzin dal di	Il chavazzin dal di	Il chavazzin dal di	
09:00	Novitads	Novitads	Novitads	Novitads	Novitads	Novitads	Novitads
09:03	La cuppina	La cuppina	La cuppina	La cuppina	La cuppina	Profil	Marella
09:15	Il chalender	Il chalender	Il chalender	Il chalender	Il chalender		
09:30	Ina chanzun – ina istorgia	Ina chanzun – ina istorgia	Ina chanzun – ina istorgia	Ina chanzun – ina istorgia	Ina chanzun – ina istorgia		
09:45	Tge chaussas	Tge chaussas	Tge chaussas	Tge chaussas	Tge chaussas		
10:00	Novitads	Novitads	Novitads	Novitads	Novitads	Novitads	Novitads
10:03						La cuppina	La cuppina
10:15	Tips, trics e tacs	Tips, trics e tacs	Tips, trics e tacs	Tips, trics e tacs	Tips, trics e tacs	Il chalender	Il chalender
10:30	Famus e glorius	Famus e glorius	Famus e glorius	Famus e glorius	Famus e glorius	Bel e bombastic	Bel e bombastic
10:45						Tge chaussas	Tge chaussas
10:55	Impuls REP.	Impuls REP.	Impuls REP.	Impuls REP.	Impuls REP.	Impuls REP.	Impuls REP.
11:00	Novitads	Novitads	Novitads	Novitads	Novitads	Novitads	Novitads
11:03	Actual da mezdi	Actual da mezdi	Actual da mezdi	Actual da mezdi	Actual da mezdi	Magazin da cultura	Concert sin giavisch

	glindesdi	mardi	mesemna	gievgia	venderdi	sonda	dumengia
11:15	Co e cum	Co e cum	Co e cum	Co e cum	Co e cum	Magazin da cultura	Concert sin giavisch
11:30	Novitads Meteo	Novitads Meteo	Novitads Meteo	Novitads Meteo	Novitads Meteo		
11:45	Total local	Total local	Total local	Total local	Total local		
12:00	Novitads	Novitads	Novitads	Novitads	Novitads	Novitads	Novitads
12:06	Actual da mezdi	Actual da mezdi	Actual da mezdi	Actual da mezdi	Actual da mezdi	Musica	Sportissimo
12:15	Cumpact da mezdi	Cumpact da mezdi	Cumpact da mezdi	Cumpact da mezdi	Cumpact da mezdi		
12:25	Prevista TSG	Prevista TSG	Prevista TSG	Prevista TSG	Prevista TSG		
12:30	SRF Rendez-vous	SRF Rendez-vous	SRF Rendez-vous	SRF Rendez-vous	SRF Rendez-vous		
12:45						Da num e da pum Prevista MSG	Ilis auters Prevista CUN
13:00	Las gratulaziuns	Las gratulaziuns	Las gratulaziuns	Las gratulaziuns	Las gratulaziuns	Las gratulaziuns	Las gratulaziuns
14:00	Novitads	Novitads	Novitads	Novitads	Novitads	Novitads	Novitads
14:03	Artg musical <i>REP.</i>	La Stailalva <i>REP.</i>	Noss chors <i>REP.</i>	L'instrument. <i>REP.</i>	La populara <i>REP.</i>	Parada da hits	Artg musical
15:00	Novitads	Novitads	Novitads	Novitads	Novitads	Novitads	Novitads
15:03	Las perlas <i>REP.</i>	Soundcheck <i>REP.</i>	Musica	Musica	Musica	Parada da hits	La classica <i>REP.</i>
16:00	Novitads	Novitads	Novitads	Novitads	Novitads	Novitads	Novitads
16:03	Sempverds Top 3	Sempverds Top 3	Sempverds Top 3	Sempverds Top 3	Sempverds Top 3	Sempverds Top 3	Sempverds Top 3
16:30	Program da kino	Program da kino	Program da kino	Program da kino	Program da kino	Program da kino	Program da kino
16:50	Prevista TSG	Prevista TSG	Prevista TSG	Prevista TSG	Prevista TSG	Prevista MSG	Prevista CUN
17:00	Novitads	Novitads	Novitads	Novitads	Novitads	Novitads	Novitads
17:06	Actual la saira	Actual la saira	Actual la saira	Actual la saira	Actual la saira	Sportissimo	Sportissimo
17:30	Novitads Meteo	Novitads Meteo	Novitads Meteo	Novitads Meteo	Novitads Meteo		
17:50	Sport	Sport	Sport	Sport	Sport		
18:00	Novitads	Novitads	Novitads	Novitads	Novitads	Novitads	Novitads
18:06	Cumpact – survista dal di	Cumpact – survista dal di	Cumpact – survista dal di	Cumpact – survista dal di	Cumpact – survista dal di		
18:15	SRF Echo der Zeit	SRF Echo der Zeit	SRF Echo der Zeit	SRF Echo der Zeit	SRF Echo der Zeit	SRF Echo der Zeit	SRF Echo der Zeit
19:00	La stailalva	Noss chors	L'instrumentala	La populara	Las perlas	Soundcheck	La classica
20:00	Novitads	Novitads	Novitads	Novitads	Novitads	Novitads	Novitads
20:03	Mag. da cultura <i>REP.</i> ubain sport live	Musica ubain sport live	Profil <i>REP.</i> ubain sport live	Marella <i>REP.</i> ubain sport live	Musica ubain sport live	Musica ubain sport live	Vita e cretta <i>REP.</i> ubain sport live
21:00	Novitads	Novitads	Novitads	Novitads	Novitads	Novitads	Novitads
21:03	Musica	Musica	Musica	Musica	Musica	Musica	Musica
22:00	Novitads	Novitads	Novitads	Novitads	Novitads	Novitads	Novitads
22:03	Musica	Musica	Musica	Musica	Musica	Musica	Musica
23:00	Novitads	Novitads	Novitads	Novitads	Novitads	Novitads	Novitads
23:03	Grischun sonor	Grischun sonor	Grischun sonor	Grischun sonor	Grischun sonor	Grischun sonor	Grischun sonor
23:55	Buna notg	Buna notg	Buna notg	Buna notg	Buna notg	Buna notg	Buna notg

RTR – LAS EMISSIUNS

DA LA TELEVISIUN RUMANTSCHA

versiun matg 2018

	glindesdi	mardi	mesemna	gievgia	venderdi	sonda	dumengia
Telesguard							
17:40							
05:50		REP.	REP.	REP.	REP.	REP.	
11:50		REP.	REP.	REP.	REP.	REP.	
18:10	REP.	REP.	REP.	REP.	REP.		
18:35	REP.	REP.	REP.	REP.	REP.		
19:00	REP.	REP.	REP.	REP.	REP.		
19:10	REP.	REP.	REP.	REP.	REP.		
22:00	REP.	REP.	REP.	REP.	REP.		
Sil punct (emissiun da stad: 02-07 – 17-08-2018)							
17:50							
Cuntrasts/Controvers							
17:25							
07:30							REP.
08:30			REP.				
09:30			REP.				
11:00				REP.			
12:50			REP.				
13:20					REP.		
14:00		REP.					
17:10						REP.	
Minisguard							
17:40							
11:50							REP.
17:10							REP.
18:00						REP.	
19:05						REP.	
Pled sin via							
20:00	1. d'avust 28-07-2018						
19:20	Nadal 25-12-2018						

Tutgar il puls al public – infurmar, divertir e tgirar ils contacts

Cun la finamira d'entrar en discussiun cun ses public ha RTR nizzegià la chaschun da sa preschentar a l'Agrischa a Cuira ed a l'EBexpo a Scuol.

Dals 7 fin ils 8 d'avrigl è RTR stà preschent a l'Agrischa cun la «Micro-lotta». E sco experimentà gia numerusas giadas, è quella in vair attira-sguard e rumpaglatsch per entrar en discurs cun ils visitaders e las visitadras. La pussaivladad da s'infurmar davart la lavur quotidiana da RTR ed ils inscunters persunals cun la directura Ladina Heimgartner ed il schefredactor Flavio Bundi è vegnids stimads. Era la concorrenza «Chattas las 5 differenzas?» ha già bun resun tar ils pli giuvens visitaders e las pli giuvnas visitadras.



A l'EBexpo han ils uffants nizzegià la chaschun da participar a la concorrenza da RTR.

Per uffants, creschids e nostalgichers

Dals 27 fin ils 29 d'avrigl ha già lieu a Scuol l'EBexpo, l'exposiziun d'industria, mastergn e commerzi da l'Engiadina Bassa. Er a chaschun da questa occurrenza han en spezial ils gieus carmalà il public al stan da RTR. Tant «Kikeri6» sco era la con-

currenza per gudagnar ina fin d'emna en il «Conny-Land» è stads fitg populars. Ed er ils nostalgichers n'èn betg vegnids a la curta: Flavio Huonder, documentalist da RTR, ha preschentà l'archiv digital da nossa chasa da medias e sfeglià cun ils interessads en il pli nov project da

RTR, la pagina d'internet nossai-storgia.ch, l'emprima plattform digitala participativa davart l'istorgia da la Svizra rumantscha e dal Grischun.

Madlaina Niggli, referendaria comunicaziun e marketing

Cun RTR al campionadi mundial da ballape en Russia

(aw) Gia per la quarta giada en seria èn ils Svizzers sa qualifitgads per il campionadi mundial da ballape, il pli grond eveniment da sport in summa. Mintga quatter onns datti sin l'entir mund ina gronda festa da ballape e RTR porta era questa giada las emoziuns

tar Vus en stiva. Andreas Wieland accompogna nossa equipa naziunala e stat sin ils chaltgogns a Xherdan Shaqiri, Granit Xhaka e collegas. Sabrina Bundi prenda dimora en la chapitala Moscau e rapporta da quai che capita en il turn dal campionadi mundial.

La naziunala Svizra è staziunada a Toljatti, bun 80 kilometers davent da Samara a l'ur da la Volga. Gia en l'emprim giu da gruppa vegni per l'equipa da Vladimir Petkovic tar in inscunter tut spezial.

Ils Svizzers fruntan a Rostov-on-Don sin il campion da record, la Brasilia (17-6) cun ses superstar Neymar. En il segund giu da gruppa cumbatta la Svizra a Kaliningrad encunter la Serbia (22-6) ed en il davos giu da gruppa spetga a Nizhny Novgorod la Costa Rica (27-6).

RTR rapporta da tut ils gieus da l'equipa naziunala Svizra e di per di èn d'udir al Radio Rumantsch istorgias ord la Russia, quai mintgamai la damaun a las 7:20 e la saira a las 17:20.

Tut las istorgias, ils rapports, las reacziuns e las impressiuns chattais Vus era sin nossa pagina d'internet rtr.ch.

RTR sin via tar Vus

Qua chattais Vus ina survista dals events, nua che RTR è da la partida.*

Nus ans legrain da Vossa visita.

9 e 10-6-2018

a Chiavenna:

Festa chantunala da chant

16-6-2018 a Cuira:

Open Air Arcas

22 fin 23-6-2018

a Casacchia:

Open Air Sur l'Aua

30-6-2018 a Cuira:

Kinderspieltag Chur

14 e 15-7-2018

a Savognin:

Festa d'uffants

19 fin 21-7-2018 a

Degen:

Open Air Lumnezia

21 e 22-7-2018 a Laax:

Festa d'uffants

25-8-2018 a Sagogn:

Premiera dal film rumantsch «Amur senza fin»

29-7-2018 a Guarda:

Sin il viv! – Impuls sin turnea

3 e 4-8-2018 a Sedrun:

ROCKseDRUN

26-8-2018 a Lumbrein:

Sin il viv! – Impuls sin turnea

22 e 23-9-2018 a Fläsch:

Festa da vin

*Questa survista vegn completada mintga mais.

Dapli infurmaziuns sin rtr.ch.

As annunziai per il Suisse Quiz 2018

In quiz per Svizzers, in quiz da Svizzers, in quiz sur da la Svizra, in quiz en 4 linguas. Ed il final ha lieu l'emprim d'avust: il num è pia program.

(rs) L'onn passà ha il Suisse Quiz già premiera. Per l'emprima giada ha la SRG SSR produci in quiz radiofonnic en 4 linguas. In Romand, in da lingua taliana, ina candidata da lingua tudestga ed in Rumantsch èn sa scuntrads a Berna per eruir tgi dad els ch'enconuscha il meglier la Svizra. Gudagnà ha la fin finala il Talian, gea propi, in Talian che viva en il Tessin, Mauro Cacciavio. Ed er il finalist rumantsch, Casper Deflorin da Mustér, ha fatg buna figura.

RTR tschertga candidats e candidatas

Era quest onn tschertgan ils radios da tut las 4 regiuns linguisticas da la SSR la persuna ch'enconuscha il meglier la Svizra. Tgi che ha interess po s'annunziar cun il formular sin rtr.ch/suissequiz. Da tut las annunzias elegia RTR 8 candidats u candidatas. En emissiuns da preselecziun tschertga il Radio Rumantsch la fin da zercladur il finalist u la finalista rumantscha. Il final ha lieu l'emprim d'avust a Berna. Il



Il final dal Swiss Quiz 2018 vegn moderà da Ladina Schena per RTR, Stéphane Gabioud per RTS, Sven Epiney per SRF e Davide Gagliardi per RSI.

victur u la victura gudogna in bonda far vacanzas en Svizra en la valita da 5000.- francs.

Per tut tgi che fa gugent quiz ed enconuscha la Svizra datti a partir dal fanadur sin rtr.ch in quiz per in e

mintgin. Era là pon ins cun in zic fortuna gudagnar in bel premi en la valita da 1500.- francs.

Dapi 90 dis en la partiziun D+A

Dapi il favrer lavur jau uss en pensum parzial tar RTR, e dapi lura hai jau savens udi la dumonda «Tge fas insumma tar RTR?» – «Jau sun tar D+A, documentaziun ed archiv». Quella resposta ha evocà gia inqual giadas egliadas pitgivas e dubiusas ed jau hai constatà che blers han in'imaginaziun faussa u forse er obsoleta d'in archiv contemporan. La lavur è tut outra che suflar davent pulvra da cassetas vegliandras giu en in tschaler.

Mes pensum è zunt interessant ed era variant. En emprima lingua sun jau vi da marcar u tagliar emissiuns da televisiun digitalisadas e

sco a lunga vista er ad interessents externs. Plinavant descriv jau musica da DCs ord atgna producziun. En quest regard èn las interde-

zialmain la collavuraziun cun la redacziun da musica e cun l'archiv da SRF. Schebain che mintgin tar D+A ha ses agen sector spezial, enconuscha el las differentas spartas ed uschia èn er il spiert da grupp e la collegialitad entaifer noss team fitg fermes.

1000 segns da l'archiv

vi da descriver singulas contribuziuns, quai per far visibel ed accesibel l'archiv tant a las redacziuns

pendenzas tranter las differentas partiziuns ed unitads d'interpresa fitg remartgablas, en mes cas spe-

Ralf Beer,
collavuratur D+A

«La Canorta»: chantar en per Chiavenna

La festa chantunala da chant è in dals puncts culminants en il program da RTR da quest onn. Numerus chors èn sa preparads per quest eveniment che ha lieu mo mintga 6-7 onns.

Questa festa è lura era stada il motiv principal per RTR da lantschar «La Canorta», in'emissiun speziala dal public per il public. Sper preschentar chanzuns da concorrenza d'anterioras festas da chant, avain nus era vuli laschar reviver durant l'emissiun reminiscenzas ed anecdotes personalas da nossas audituras e da noss auditurs e sentir il puls dals chors curt avant Chiavenna. Questa nova furma da far radio ha dà a nus la pussaivladad d'integrar anc dapli il savoir, l'inschign e l'experiencescha dal public en noss program.

«Quei ei tipic per mei»

Cun il chantadur passiuà Guido Derungs avain nus chattà in ospitant ideal per l'emissiun. In che ha savì da tge ch'el discorra: var 50 onns experiencescha ha el sco chantadur en differents chors. Durant quatter sairas ha el moderà l'emissiun cun bler entusiassem, grond plaschair ed umor. L'entschatta haja el bain gi in pau fadia da vegnir en la materia, però suenter saja quai lura i «nuota schi mal», ha Gui-

do Derungs manegià suenter ch'el aveva dumagnà sia emprima emissiu tar RTR.

«Sin la damonda da moderar l'emissiun vai jeu spontan detg gie. Quei ei tipic per mei, tut quei ch'ei niev cudezza d'emprender d'enconuscher. Gia mo veser il studio en sia entira grondezia ha fatg gronda impressiu», uschia Guido Derungs. Era moderar sulet, senza avair in visavi real, saja l'entschatta stà in zichel curius. Tuttina haja el giudi plainamain questa experiencescha. «Il pli interessant ei segiramein stau d'entrar el studio, prender plaz e spitgar sil signet dall'emissiun», raquinta il chantadur passiuà, «quei mument leu era il puls sin 200.» Grazia fitg a tut las chantaduras ed a tut ils chantadurs per la participaziun e per las anecdotes. E grazia Guido – per tes curaschi e tes engaschi!

Flavio Bundi, schefredactor

Tut las emissiuins da «La Canorta» pudais Vus tadlar sin rtr.ch/cultura



Durant quatter sairas ha Guido Derungs moderà «La Canorta» al Radio Rumantsch, in'emissiun speziala dal public per il public.

La concorrenza



Co ha num la nova moderatura dal Telesguard?

- Nina Defuns
- Oceana Galmarini
- Corina Schmed



Premi:

1 radio DAB+

Tramettai la risposta fin ils 30 da zercladur ad:

accents@rtr.ch ubain a

RTR Radiotelevision Svizra Rumantscha

Accents

Via da Masans 2

7000 Cuira

La victura da la davosa concorrenza:

Ancilla Zanetti, Scuol

LAVURATORI FAR MEDIAS

TGE È SCHURNALISSEM?
CUN QUEST LAVURATORI PUDAIS VUS SEZS
ESSER DURANT IN DI SCHURNALISTS
DA RADIO E MULTIMEDIA.

29-09-18, A LAS 08:30-17:30

13-04-19, A LAS 08:30-17:30

28-09-19, A LAS 08:30-17:30

Annunzia sin www.rtr.ch/plazzas

Rumantsch è cool



(rtr) Dals 9 fin ils 13 d'avrigl è la scola primara da Lantsch sa fatschentada durant in'emna da project cun il rumantsch. Igl ha dà differents lavuratori e visitas en las vischnancas rumantschas da la Val d'Alvra e durant in di èn ils scolars e lur magisters era stads a Cuira per visitar la Lia Rumantscha e la chasa da medias RTR. La finamira da l'emna da project è stada quella da sensibilisar tant ils scolars sco er ils geniturs per l'importan-za dal rumantsch.

Material tecnic da la SRG SSR per la Bosnia

Bun 360 kg material tecnic che la SSR na dovra betg pli è vegnì transportà la fin da mars a Sarajevo en Bosnia-Erzegovina.

(srg sss) Belmin Karamehmedović, il directur general da l'instituziun dal dretg public per radiodiffusiun Bosanskohercegovačka radiotelevizi- zija (BHRT), è sa drizzà cun ina du- monda da sustegn a la SSR. Sin fun- dament da la situaziun finanzia- la desolata saja l'existenza da l'emet- tur periclitada. En spezial l'incasso da las taxas saja difficil. Per man- canza da las entradas na saja quai era betg pussaivel da sviluppar la di- gitalisaziun e l'infrastructura ac- tuala saja antiquada.

Sustegn era da RTR

La direziun generala da la SSR ha

sustegnì la dumonda, e Christoph Schibli, schef da stab da la partiziun operaziuns, ha coordinà la rimnada dal material. La finala han RTR, RTS ed il studio da la SSR en Chasa fede- rala pudì metter a disposiziun als collegas a Sarajevo material tecnic ch'è vegnì preni ord funcziun avant pauc temp. Il material cumpi- glia per exempel apparaturas per elavurar maletg e tun, apparats da registrar e reproducir, pults da ma- schadar, autpledaders e laptops. Or dals differents studios è il material vegnì transportà en il center logistic dal TPC a Turitg-Oerlikon e davent da là en Bosnia-Erzegovina.



Il center logistic dal TPC ad Oerlikon: Patrick Dall'Oglio prepara il material per il transport.

KIKERI6

IL GIEU DA PRETENSIONS

GLI-SO A LAS 07:40

SRG SSR



al puls dal Grischun

RTR

Radiotelevisiun
Svizra Rumantscha

RTR è in bun exempel en chaussa social media

Facebook, Instagram, Twitter, Snapchat: las medias socialas èn stadas il tema principal da l'inscunter che ha gì lieu l'avrigl en Belgia.

Sa participadas a l'inscunter èn las suandantas chasas da medias da linguas minoritaras: Radio 100'7 Luxemburg (luxemburgais), Belgischer Rundfunk BRF (tudestg), Rai-Südtirol (tudestg) e RTR. La finamira principala da l'inscunter ch'è vegnì organisà l'emprima giada avant intgins onns è da barattar experientschas e know-how davart differents temas. Quatter chasas da medias – trais differents modas da sa fatschentar cun las medias socialas. Entant che RTR è gia fitg lunsch, surtut era cun il project naziunal «Nouvo», cun «battaporta» e cun RTR-Social èn ils collegas da la Rai-Südtirol strusch preschents sin social media. Radio 100,7 e BRF èn insanua tranter quests dus extremis.



Per RTR ha Flavio Deflorin (segund da sanestra) participà a l'inscunter da las chasas da medias da linguas minoritaras ad Eupen en Belgia.

Tgi fa dapli – tgi pli pauc

Il radio 100,7 da Luxemburg è activ sin social media e porscha links d'artitgels selecziunads che mainan sin la pagina uffiziala dal radio. Els han dentant senti che «posts» cun filmis u maletgs, per exempel direct sin Facebook, funcziunan meglier che «mo» links, sin ils quals l'auditor sto smatgar. En in proxim pass èsi planisà da crear ina plazza da lavur che s'occupa exclusivamain da social media.

La Rai-Südtirol è activa cun novitads/infurmaziuns sulettamain sin Twitter. Actualmain n'èsi betg pussaivel per els d'extender la purschida social media, quai vulan els dentant far uschespert ch'els han la chaschun d'elavurar ina nova strategia. Il BRF è gia pli lunsch ch'els collegas dal Südtirol e dal Luxemburg. Els nizzegian las pussaivladads da Fa-

cebook, Twitter & co. cun ils dus channels BRF1 e BRF2. Ultra da plazzar fotografias, videos e links, fan els da temp en temp era livestreams d'events che han lieu tar els en chasa. Tut las partidas èn conscientas da l'impurtanza che las medias socialas han era per il schurnalissem. Impurtant – quai il facit da la discussiun – è il fatg ch'ins producescha dentant

era cuntegns specifics per questas plattafurmas.

Uschia po ina chasa da medias esser al puls dal temp, al puls da l'auditori e nus era al puls dal Grischun.

Flavio Deflorin,
redactor NOUVO





Chastè-trampolin, istorgias e chanzuns rumantschas - RTR è quest onn preschent a las festas d'uffants a Cuira, Savognin e Laax.

Cun RTR a las festas d'uffants

Chastè-trampolin, battaglias da ballas en l'aua e raiver sin harassas – las festas d'uffants adempleschan blers giavischs.

Dis da divertiment che appartegnan be a las pli giuvnas ed als pli giuven: per tge uffant n'è quai betg in fervent giavisch? Sco chasa da medias per la Svizra rumantscha che porscha cuntegns audio, video ed online era per ils uffants na dastga RTR betg mancar durant quests dis spezial. Uschia è RTR questa stad preschent a trais festas d'uffants cun la finamira da divertir ils pli pitschens da ses public.

Trais fin d'emnas cun RTR

L'emprim lieu d'acziun è la Quaderwiese en il center da la citad da Cui-

ra. A la festa d'uffants dals 30 da zercladur è RTR da la partida cun in chastè-trampolin ed ina staziun da far fotografias. Là pon ils uffants sa travestgir en figuras fabulusas e far ina fotografia ch'els pon prender a chasa sco regurdientscha da quest di magic. En la tenda da paraulas vegnan pliras giadas al di raquintadas istorgias rumantschas e chantadas chanzuns d'uffants.

Cun in sumegliant concept è RTR era preschent ils 14 e 15 da fanadur a la festa d'uffants a Savognin ed in'emna pli tard, ils 21 e 22 da fanadur, a Laax.

Nova purschida online per uffants

Las collavuraturas da RTR ch'èn al lieu cun in stan d'infurmaziun preschentan gugent la nova purschida online per uffants sin rtr.ch/uffants e respundan a Vossas dumondas. Ultra da quai pon ils uffants prender part dal gieu «Chattas las 5 differenzas?» e Vus avais la pussaivladad d'As participar a la concorrenza annuala da RTR e gudagnar ina fin d'emna per l'entira famiglia en il «Conny-Land».

Madlaina Niggli, referendaria comunicaziun e marketing

Il program

Cuira, 30-6-2018

10:00-17:00, Quaderwiese.

Paraulas:

11:00 Ils musicants da Brema

15:00 Gionin e Grettina

Savognin, 14/15-7-2018

10:00-17:00, Lai Barnagn/

Tignas.

Paraulas (sonda):

11:00 Ils musicants da Brema

13:00 La famiglia Babulin

15:00 Gionin e Grettina

Paraulas (dumengia):

11:00 Gionin e Grettina

13:00 Ils musicants da Brema

Laax, 21/22-7-2018

10:00-17:00, Lag Grond.

Paraulas (sonda):

11:00 Ils musicants da Brema

13:00 La famiglia Babulin

15:00 Gionin e Grettina

Paraulas (dumengia):

11:00 La famiglia Babulin

13:00 Gionin e Grettina

15:00 Ils musicants da Brema



Adina quels Zwinglis – ils uffants dal reformatur Huldreich Zwingli sa regordan

(rs) L'onni passà, il 2017, è stà l'onni da la reformaziun, ed era la Svizra ha festiva il giubileum da 500 onns dapi la reformaziun. Ma la reformaziun n'è betg capitada entaifer in onni. Ella ha cuntinuà er ils onns suenter il 1517. Uschia ha la baselgia reformada da Turitg fatg in film animà sur dals uffants

da Zwingli. Ueli, Regula e Wilhelm sa regordan da lur bab Huldreich e dad insaquantas istorgias en connex cun la reformaziun. Uffants da Mustér e da Müstair han dà lur vuschs als protagonistas da la versiun rumantscha dal film ch'ins po guardar sin rtr.ch.





Il scriptur Arno Camenisch ha prelegì texts rumantschs e tudestgs anc betg publitgads.



Il chor d'uffants Cantolino da la scola da musica Landquart e conturn cun scolaras e scolars da l'emprima fin la quarta classa.

Beatbox, ländler, a-capella, chant e prelecziuns - Quai è stà il Da cumpagnia a Landquart

Il 25 da matg ha Radiotelevision Svizra Rumantscha (RTR) organisà il Da cumpagnia en il Forum im Ried a Landquart. La sairada cun dus concerts ed ina prelecziun ha procurà per buna luna.

Sco emprim ha la moderatura Elin Batista beneventà la grupp da musica populara da la scola da musica Landquart e conturn ch'è sa furmada aposta per il Da cumpagnia.

Il chor d'uffants Cantolino ha chantà chanzuns per englais e tu-

destg, e cun quai grond plaschiered engaschi.

Il scriptur sursilvan Arno Camenisch ha prelegì or da ses cudesch «Hinter dem Bahnhof» ed era texts rumantschs e tudestgs curts. Cun ses stil da leger e scriber ha el

tschiffà mintga visitader e mintga visitadra, ed ha procurà uschia per kino en ils chaus.

A la fin ha la grupp Invivas purtà anc ina giada blera buna luna ed animà in u l'auter da chantar u saltar. Ils tschintg giuvens han

chantà atgnas chanzuns e hits mundials en ina furma pauc usitada – in vair daletg per egl ed ureglias.

Marina Morgenthaler,
Referendaria social media
ed events



La chapella da musica populara è sa furmada aposta per il Da cumpagnia.



Invivas, la furmaziun a-capella, ha intgantà giuven e vegl.

TUNS E SUNS DA REZIA CANTAT 2018

SRG SSR

RTR è per Vus al puls da la festa chantunala da chant e registrescha las producziuns da festa – d’udir al Radio Rumantsch sco suonda:

ARTG MUSICAL

08-06-2018, 22:03
09-06-2018, 22:03
10-06-2018, 11:03
11-06-2018, 14:03
17-06-2018, 14:03

NOSS CHORS

12-06-2018
19-06-2018
26-06-2018
03-07-2018
Mintgamai a las 19:00

LA CLASSICA

Dumengia,
ils 10-06-2018,
a las 19:00
Concert dal Chor
da giuvenils Svizzer

Dapli sin rtr.ch

RTR

Radiotelevision
Svizra Rumantscha

al puls dal Grischun



La libertad da las medias è periclitada

Ultimamain è cumparì il rapport annual 2017 da l'Autorità independenta da recurs davart radio e televisiun (AIRR). En la prefaziun sa fatschenta il president Vincent Augustin cun il process da concentraziun da la cuntrada da medias svizra.

Curt avant Nadal 2017 han la NZZ e l'AZ-Medien communitgà l'intenziun da fusiunar lur gasettas localas. L'entschatta dal 2018 suondan L'Impartial e L'Express (la pli veglia gasetta quotidiana da la Svizra che cumpara anc oz) e cunquai la fusiun da duas gasettas regiunalas dal Giura Neuschatelais. La Basler Zeitung e la Südostschweiz collavuran gia. Ulteriuras fusiuns vegnan a suandar. Era la SDA – che offrescha ina purschida da basa – stat avant ina reduenziun da plazzas signifiganta. Ins na sto betg esser in profet per savair prognostitgar ch'i vegnia bainbaud a dar be anc paucas gasettas resp. edituras da medias d'irradiaziun naziunala. Quest svilup è dictà dals retgavs che van enavos e sforzan da spargnar. Bunamain il medem mument mettan ils iniziants da No-Billag facticamain en dumonda la SSR sco chassa da medias naziunala dal dretg public. Percunter surpiglia la TAMEDIA la Goldbach Group, entant ch'ìls fundatur da CNN Money Switzerland han realisà durant il WEF 2018 in nov emettur da spartas. Il medem mument annunzia il fundatur da Facebook, Mark Zuckerberg, in nov uschenumnà newsfeed. I sa tracta da ina selecziun d'actualisaziuns dal status, da fotos, videos ed anc dapli per che Facebook survegnia ina nota pli persunala. Enstagl da novitads datti «impurtantas interacziuns socialas» cun l'aug Alfons e l'amia Maria. La «gasetta per tuts» vegn uschia sutterrada (Oliver Fuchs). Las medias tradiziunalas vegnan – puspè

ina giada – ad esser tranter las grondas perdentas. Las entradas ord la reclama na vegnan betg a returnar tar las medias svizras, mabain ad alimantar gigants da l'Europa e dals Stadis Unids da l'America.

Objectiv, senza discriminar e multifar

Parallel cun quest trend da concentraziun vegnan schurnalists beffegiads, disfamads, smanatschads ed anc dapli, e betg mo en l'Etiopia, en Russia u en Turchia, mabain era – e gist ussa – dal president dals Stadis Unids, gnanc da discurren da «hate speech» en las medias socialas. Tut quai metta directamain ed indirectamain sut squitsch la multifariad da las medias. Sco quai che Jonathan Franzen scriva (NZZ dals 14 d'october 2017) na datti nagin remplazzament per il schurnalista che ha 20 onns experientscha professiunala e sa co ch'el sto interpretar ils resultats da sias retschertgas. Sche la democrazia vul survivor, stuain nus pensar criticamain davart las consequenzas che noss diever da tecnologias novas effectuescha. Nus stuain emprender da dir na ed emprender co che nus pudain sustegnair quels servetschs impurtants per la societad sco il schurnalisssem professiunal, enstagl d'als destruir. (Anc) èsi tenor la Constituziun federala il duair da l'AIRR da procurar per che las medias da massa svizras rapportian objectivamain, senza discriminar e sche necessari era multifar-main. Ils utilisaders da las medias na



duain betg vegnir servids cun spir baterlim da nagut e comunicaziuns irrelevantas da la gruppa da Facebook, mabain cun emissius d'infurmaziun per pudair furmar in'atgna opiniun davart fatgs ed eveniments. Pertge? La gruppa d'interess specificis da Facebook n'è nagut auter ch'il return ad ina situaziun surmuntada che s'effectuescha bler pli ermeticamain che cuminanzas culturalas naziunalas u religiosas of-

fline (Roberto Simanowski). Quai na sa lascha dentant betg colliar cun la libra furmaziun da l'opiniun tras medias libras e multifaras.

Vincent Augustin,
president da
l'autorità da recurs

L'entir rapport annual 2017 da l'AIRR è publitgà sin www.ubi.admin.ch.

**DAVENTAI COMMEMBER
DA LA SRG.R**

Contribuziun annuala:
CHF 20.– per persunas singulas
CHF 30.– per uniuns
CHF 80.– per persunas giuridicas

RTR – Ils rapports davart No Billag èn stads neutrals e professiunals

En sia seduta dals 9 da matg 2018 ha il Cussegl dal public SRG.R mess il focus sin las votaziuns dals 4 da mars 2018. En il center da quest di è stada la votaziun No Billag.

Il Cussegl dal public (CDP) ha analisà, schebain RTR ha rapportà a moda correcta e professiunala. El è vegnì a la conclusiun che quai è stà il cas. Las infurmaziuns sajan arrivadas sveltes, ils rapports sajan stads corrects ed ils collavuraturers na sajan betg stads memia emoziunals. Ultra dal focus sin No Billag haja RTR era rapportà a moda adeguada da la votaziun davart il nov urden da finanzas 2021 e da las votaziuns regionalas. Che questas votaziuns hajan quest di survegnì pli pauc spazi saja giustifitgà. La votaziun davart No Billag saja stada da grond'impurtanza per l'entir Grischun e surtut per ils Rumantschs. Il Cussegl dal public ha constatà ch'ins haja survegnì bunas impressiuns davart l'atmosfera tar ils iniziants ed ils adversaris da No Billag, saja quai via radio, via televisiun u er en la rait. Il liveticker sin rtr.ch e la charta geografica cun ils resultats da mintga vischnanca hajan

persvadi. In punct da critica dal CDP pertutga in'intervista cun Martin Candinas live or d'ina ustaria. La qualitad dal tun saja stada uschè mala ch'ins haja strusch chapì in pled. Tut en tut fa il CDP in grond compliment a las collavuraturas ed als collavuraturers da RTR per ils rapports dals 4 da mars. Ulteriurs temas da la seduta èn stads il «Maraton da skis engiadinais» ed il «Surselva Jam» a Breil.

50avla ediziun dal Maraton da skis engiadinais

Las istorgias avant e durant il Maraton da skis engiadinais han plaschì bain. Il public haja pudì accompagnar divers curridurs e quai haja dà in purtret fitg cumplexsiv dal maraton. Ultra da quai hajan las infurmaziuns or da l'archiv da RTR cumpletta il purtret er en connex cun il giubileum dal maraton. Tge che saja crudà en ureglia è ch'igl ha dà surtut intervistas cun persunas nunenco-

nuschentas. Quai ha RTR dentant fatg sapientivamain. L'idea saja da betg adina mo sa concentrar sin persunas enconuschentas.

10avla ediziun dal Surselva Jam a Breil

La reclama per questa occurrenza ch'è vegnida emessa via livestream saja stada fitg vasta e suffizienta. L'emissiun haja gi in bun ritmus, saja stada spontana e plain vita e surtut ils commentaris da l'expert sajan stads fitg variads. Vers la fin eran ils commentaris magari repetitivs. Quai saja dentant chapaivel, cunquai ch'ils sigls sajan er adina puspè ils medems. La tavla da puncts haja dà in caracter spontan e famigliar, ma il dischavantatg da questa tavla en furma da palpìri saja ch'i dettia era sbagls e ch'ins na possia betg dar ina survista cumplaina u cumparegliar ils resultats da las diversas gruppas. En general ha l'emissiun sco tala plaschì bain. Il CDP è dentant sa

dumandà, schebain i fa senn da far talas stentas per emetter in'occurrènz uschè pitschna. La direccura da RTR, Ladina Heimgartner, ch'è stada preschenta a la seduta, ha argumentà che gist talas accziuns tutgian tar il service public. I saja impurtant da rapportar d'eveniments da nischa pli pitschens e betg mo dal mainstream.

Sut la marella

Fin il proxim inscunter dals 12 da settember a Mustér s'occupan las commembras ed ils commembers dal CDP SRG.R da l'emissiun da chors speziala «La Canorta» che RTR ha realisà en vista a la festa da chant a Chiavenna, da las medias socialas en general e da la pagina d'internet rtr.ch.

Roger Tuor, president dal Cussegl dal public SRG.R

Donaziuns da trais milliuns francs per ils Rohingya

(rtr) Mesemna, ils 23 da matg, ha la Chadaina da Fortuna organisà ensem cun la SRG SSR en l'entira Svizra in di naziunal da solidaritad per ils Rohingya ch'èn fugids da Myanmar e ch'emprovan da surviver en in champ da fugitivs en il Bangladesch. Fin mesanotg è vegnì rimnà sur il numer gratuit donaziuns per total 3'025'262 francs.

En la centrala da RTR a Cuira han collavuraturers e collavuraturas da RTR ed era persunas da la vita publica dal chantun – sco p. ex. Martin Candinas, Barbara Janom-Steiner, Stephan Kunz, Martin Schmid, Thomas Roth, Martin Jäger, Seraina Ul-

ber, Daniel Spadin, Lucrezia Bärtsch euv. – prendì encunter 400 telefons cun donaziuns empermessas per 102'974 francs.

Cun las donaziuns po la Chadaina da Fortuna sustegnair l'agid d'urgenza per distribuir victualias, aua, medicaments e vestgadira ed era gidar ils centers nua ch'ils fugitivs vegnan retschavids.

Claudia Cathomen, coordinatura RTR per la Chadaina da Fortuna, ed Eveline Widmer-Schlumpf, che ha prendì encunter telefons durant il di da rimnada.



Tschintg dumondas a Reto Martinelli (42), Alpnach/Strada en l'Engiadina

Commembras e commembers da la SRG.R vegnan a pled

Reto Martinelli, pertge essas Vos commember da la SRG.R?

Oriundamain è quai stada ina decisiun spontana. Las ultimas votaziuns han però mussà ch'i dovra variaziun e diversità en il mund da las medias – e sa chapescha era spazi per la lingua rumantscha. E lura è quai er in zic nostalgia per mai. Mintga giada che jau survegn ils Accents u il quint per la commemoranza da la SRG.R pens jau al temp che jau hai lavurà sco collaboratur liber per il Radio Rumantsch.

Tge spetgais Vos da la SRG.R?

Per mai èsi fitg impurtant che la SRG SSR metta a disposiziun al rumantsch er en il futur almain tant

spazi sco fin qua. Per defender quai ch'è vegnì cuntanschì dovri ina ferma organisaziun, e per mai è quai la SRG.R.

Tgeninas èn Vossas emissiuns preferidas da RTR, e pertge gist quellas?

Igl è adina puspè in grond plaschair d'udir Roman Dobler che commentescha a moda cumpetenta e plain energia quai che capita durant la stagiun da hockey cun il HCD. Lura era las contribuziuns ed ils rapports da l'Engiadina Bassa al radio ed en la televisiun: quai che capita en mia patria interessescha il pli fitg.



Reto Martinelli è responsabel da comunicaziun e marketing da la Federaziun svizra dals funcziunaris da polizia (FSFP) e schefredactor dal magazin «police» da la FSFP.

Giavischs, critica e laud per RTR?

Restai sco quai che vus essas! Ma-

gari ma dumond jau, sch'il rumantsch grischun sto propi esser. Nus avain ina gronda variaziun d'idioms. E sche nus vulain esser sincers, sche chapin nus – cun in pau buna veglia – er in l'auter.

Tge impurtanza ha per Vos la lingua rumantscha?

Rumantsch è simplamain perfect e LA CLAV per autras linguas. Saja quai a Roma, Paris u Barçelona, grazia al rumantsch poss jau ma far chapir. Senza mia lingua materna tanschessi forza sulettamain per empustar «una cerveza». Tgi che sa rumantsch, sa simplamain dapli! Il rumantsch ans fa vegnir speziels e quai na dastgain nus mai emblidar.

Lavuratori «far medias» - l'emprim contact cun RTR

(pb) In student da giurisprudenza, in emploiada da banca, in um che tschertga ina nova sfida professiunala, ina amatura da musica rumantscha ed ina studenta da politologia.

Las participantas ed ils participants dal lavuratori «far medias» dal matg èn stads ina truppa fitg multifara che ha lavurà durant in di cun anim e plaschair en chasa RTR. Per l'in u l'auter vegn la via tar RTR a cuntinuar.

Il lavuratori è numnadamain la premissa per far in praticum en nossa chasa da medias. Il proxim lavuratori «far medias» ha lieu ils 29 da settember 2018.



Ils participants da l'ultim lavuratori «far medias»: Lukas Quinter, Martina Mayer, Carmen Monn, Reto Lazzarini e Camilla Herrmann.

Igl è puspè stà bel da sa vesair!



(rtr) Era sch'il gentar ha lieu onn per onn èn ils inscuters da la direcziun RTR cun las anteriuras collavuraturas e cun ils anteriurs collavurats adina puspè insatge spezial.

Passa 20 pensiunadas e pensiunads han dà suatientscha a l'invit ed èn arrivads en chasa RTR per s'inscuntrar cun lur collegas da lavur da pli baud e per sa laschar infurmar davart la lavur, ils plaschairs ed ils quitads da RTR e da la SSR.

Durant intginas uras han ins era gi la chaschun da discutir da temps passads e da laschar reviver reminiscenzas dal temp da lavur. Cun l'egliada enavos han ins pudì rir da blers eveniments ch'avevan chaschunà a sias uras grondas discussiuns e rumpatestas.

A revair il 2019!

Char Sergio Guetg

Dapi onns es ti in bun cumpogn per nossas audituras e noss auditurs. «Noss Sergio» aud jau sch'jau sun en tia patria, en il Grischun Central. Ma ti es già daditg era «noss Sergio» en las autras regiuns rumantschas. En il temp liber passentas ti baininqual ura vi da la platta da cuschinar, e da tias ovras culinarias ves'ins adina puspè fotografias en las raits socialas. Qua ves'ins dentant gist uschè savens era fotos d'in Sergio cuntent ed allegher al microfon dal Radio Rumantsch ed ins survegn adina il sentiment che ti impundas almain tanta passiuon per tia lavur da radio, sco per la creaziun da tes menus. Entant che ti cundividas tes plaschair da cuschinar cun famiglia ed amis, cundividas ti tes plaschair da far in bun program da radio cun nossas audituras e noss auditurs. Per quai in cordial grazia fitg e vinavant – bun'emissiun e bun appetit!

Ladina Heimgartner



Signur
Sergio Guetg
Producent moderaziun
radio RTR
Via da Masans 2
7000 Cuira